

Dithero tsa Tirelano mo Kutlwanong

15/2014: Ka Sontaga o o bidiwang Septuagesime, e le ka 16. 02. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 186 - 172/179

2. Thapelo: Rara wa rona yo o kwa magodimong, re atamela fa pele ga sefatlhego sa gago kajeno go utlwa Lefoko la gago. Morena, gore re tla re re utlwa Lefoko la gago, o re abele Mowa o o Boitshepo wa gago gore re se belaele ka pholoso e o e baakanyeditseng batho botlhe ba merafe yotlhe ka Morwao Jesu Keresete. Mowa o o Boitshepo, o nne o re tiise mo tumelong ka metlha, go ya re goroge mo botshelong jo bo sa khutleng ka ene Jesu Keresete, Morena le Mopholosi wa rona. Amen.

3. Epistolo ka fa thulaganyong ya 2 e kwadilwe mo go 1 Bakorinthe 9:24-27;

Efangele ka fa thulaganyong ya 1 e kwadilwe mo go Matheo 20:1-16a.

4. A go ipolelwe tumelo ya bokeresete!

5. Sefela sa Sefela sa 188 - 174/181

6. Thapelo ya mmadi wa thero.

7. Epistolo ka fa thulaganyong ya 6 e kwadilwe mo go Baroma 9:14-24, e re: "Jaanong re tla reng? A go na le tshiamololo mo Modimong? Le go ka! Gonne o reile Moše wa re: 'Ke tla utwela botlhoko yo ke tla mo utlwelang botlhoko; ke tla tlhomogela pelo yo ke tla mo tlhomogelang pelo.' Jaanong he, ga se ga yo o ratang, gongwe ga yo o tabogang, mme ke ga Modimo fela o o utlwelang botlhoko; gonne Lokwalo le reile Farao lwa re: Ke go tsoseditse gona moo gore ke tle ke supe thata ya me mo go wena, le gore leina la me le itsisiwe mo lefatsheng lotlhe. Ke ka moo o itshwarelang yo o ratang go mo itshwarela; e bile o thatafatsa pelo ya yo o ratang go e thatafatsa mo go ene. Jaanong o ka mpotsa o a re: O sa ntse o kgalemelelang? Kana ke mang yo o ka emalalanang le go rata ga ona? Motho ke wena! Kana o mang yo o ka ganetsanyang le Modimo? A sebopiwa se ka raya mmopi wa sona sa re: O mpopetseng jaana? A kampo mmopi ga a na thata mo letsopeng go dira selwana sengwe sa tlotlego le se sengwe sa tlotlologo, e ntse e le ka letsopa le le lengwe fela? Mme wena o ka reng, fa Modimo o ratileng go supa bogale jwa ona le go itsise thata ya ona, o itshoketse ka bopelotelele jo bogolo dilwana tsa

bogale tse di diretsweng tshenyego, gore o tle o supe lehumo la kgalalelo ya ona ka dilwana tsa bopelotlhomogi tse o di baakanyeditseng kgalalelo e sa le gale? Le rona o re biditse jalo, e seng mo Bajuteng fela mme le mo baheitaneng.” Amen.

8. Thero: Phuthego e e rategang ya Morena wa rona Jesu Keresete, Sontaga wa kajeno o bidiwa Septuagesime, gonne go setse malatsi a a 70 go ya mo moletlong wa go gopola tsogo ya Morena mo losong. Ke gore re setse re atametse mo sebakeng sa dipogo se re gopolang mo go sona dipogiso le loso lwa Morena wa rona Jesu Keresete, tse di boitshegang. Phuthego, Jesu yo re mo tsaletsweng kwa Betleheme, ke yo e bileng a bogisiwa, a swa, a tsoga. Ditiro tseo ga a ka a di itirela, mme o di diretse setho sonke gore se pholosiwe. A di direla merafe yotlhe, le fa e le Baiseraele, gongwe merafe e mengwe, Bajuta le Bagerika, ba bantsho le ba basweu, a di direla rona rotlhe.

Phuthego, ka moo a go se nne ope yo o intshang mo pholosong eo ka go gopola gore Modimo o ne a tlhaola morafe o le mongwe fela, go o baakanyetsa ona fela pholoso, mme a tlhaolela ba bangwe go latlha. Lefoko la thero ya kajeno le re: “Mme wena o ka reng, fa Modimo o ratileng go supa bogale jwa ona le go itsise thata ya ona, o itshoketse ka bopelotelele jo bogolo dilwana tsa bogale tse di diretsweng tshenyego?” A go tlhokomelwe sentle, mo ditemaneng tseo ga go bolelwe gore dilwana tsa bogale di ne di direlwa tshenyego ke mang. Ka mafoko a mangwe e Beibele go utlwala sentle gore ga se Modimo o o di diretseng tshenyego, dilwana tseo tsa bogale, gonne Modimo o rata gore batho botlhe ba pholosiwe, le go fitlhela mo kitsong ya boammaaruri. Mme Modimo ga o pateletse ope gore a amogele pholoso e a e baakanyeditsweng ka loso le tsogo ya ga Keresete, yona e baakanyeditswe batho botlhe ba merafe yotlhe ba dipaka tsotlhe. Le fa go ntse jalo, go na le ba le bantsi ba ba sa batleng go amogela taletso e e re laletsang rotlhe gore re itshwarelwe maleo mo leineng la ga Keresete ka go dumela mo go ene. Ke gore ba ya mo tatlhegong ka ntlha ya go gana ga bone, ka ntlha ya boleo jwa bone. Mme ka bona ba ba pholosiwang re a utlwa gore Modimo o supa “lehumo la kgalalelo ya ona ka dilwana tsa bopelotlhomogi tse o di baakanyeditseng kgalalelo e sa le gale.” Fano go kwadilwe ka thanolo gore ke ona o o di baakanyeditseng kgalalelo.

1. Ke gona ka moo mafoko a thero ya kajeno a botsa potso e e reng: “Jaanong re tla reng? A go na le tshiamololo mo Modimong?” Karabo e re: “Le go ka!” Go ntse jalo: Ga go na tshiamololo epe mo Modimong. Modimo ke wa tshiamo ka botlalo fela. A re gopoleng gore Modimo o tlhodile legodimo le lefatshe mo tshimologong, ka ga dibopiwa tsotlhe tsa ona re a

utlwa gore "Modimo wa leba dilo tsotlhe tse o di dirileng, wa fitlhela di le molemo thata," Gen. 1:31.

Go ntse jalo, phuthego: Ga go na tshiamololo epe mo Modimong. Modimo ga o gobebele sefatlhego sa motho, ga a tlaole morafe o o rileng ka tlhophololo, ga o batle loso lwa moikepi, o a rata gore botlhe ba pholosiwe, 1 Tim. 2:4; 2 Pet. 3:9; Hes. 33:11. Le fa go ntse go a batlega gore re lemoge sentle, re akanye ka fa mafokong a le mantsi a Dikwalo tse di boitshepo, fa go rutiwa ka go utlwala gore ba ba pholosiwang ba tlhaoletswe go pholosiwa, Baroma 8:28-30; Baef. 1:3-5; 2 Bathes. 2:13; 2 Tim. 1:9. Go kwadilwe jalo gore pholoso ya rona e tlhongwe, e thewe mo kitsong, fa re pholosiwa ka bopelotlhomogi jwa Modimo fela, jaaka go kwadilwe mo go Baroma 11:6. Mme le se sengwe se tshwanetse go tlhokomelwa fela jalo, fa go sa kwalwa mo Beibeleng gore Modimo o tlhaoletse ba ba latlhegang go latlhwa, jaaka go rutiwa mo dikerekeng tse di salang Kalwini morago. Nyaya, Modimo ga se o o ntseng jalo gore o tlaolele bangwe go latlhwa. Lefoko le re: Modimo o rata gore botlhe ba pholosiwe. Ke ka ntlha ya moo, fa Paulo a tumisa Modimo ka ntlha ya pholoso e o e re baakanyeditseng ka Keresete, rona rotlhe ba re dumelang mo go Keresete, a re: "A go bakwe Modimo, Rra Jesu Keresete, Morena wa rona, o o re tshegofaditseng ka masego otlhe a mowa mo legodimong ka Keresete jaaka o sa le o re itlhophela ka ene pele, lefatshe le ise le tlholwe, gore re nne boitshepo, re se nyatsege fa pele ga ona. Ka o sa le o re tlhomamisa pele ka lorato go nna bana ba ona ka Jesu Keresete ka fa natefelong ya thato ya ona, gore go bokwe kgalalelo ya bopelotlhomogi jwa ona jo o re tlhomogetseng pelo ka jona ka Morwaa-ona yo o ratwang," Baef. 1:3-6. Go ntse jalo, phuthego. Ga go na tshiamololo mo Modimong. Modimo o rata gore "batho botlhe ba pholosiwe, le go fitlha mo kitsong ya boammaaruri," 1 Tim. 2:4. Modimo wa re: "Ka botshelo jwa me! Ga ke kgatlhwe ke loso lwa moikepi. Se se nkgatlhang ke fa moikepi a tlogela tsamao ya gagwe, a tshela." Hes. 33:11.

Go ntse jalo. Modimo o a rata gore batho botlhe ba pholosiwe, le wena, le nna. Yo o pholosiwang o pholosiwa ka bopelotlhomogi jwa Modimo, yo o latlhegang o latlhwa ka ntlha ya melato ya gagwe. Ga go na ope yo o kgethelwang go latlhwa, gongwe go lathega. A go gopolwe gore ba ba romelwang mo tatlhegong ba romelwa mo felong fa go baakanyeditsweng Satane le baengele ba gagwe, Math. 25:41, e le felo fa go sa baakanyediwang batho, ba ba romwelwang teng ba romelwe mo felong foo ka ntlha ya ditlolo tsa bone, mme ba ba amogelwang mo legodimong ba rua boswa jwa puso ya Modimo e ba e baakanyeditsweng e sa le ka tlholego ya lefatshe, Math. 25:34.

2. Ka moo a re boeaeleng re ipotsise ka potso e e reng: **"Jaanong re tla reng? A go na le tshiamololo mo Modimong?" Karabo e re: "Le go ka!"** Barategi, Lefoko le a tswelela, le re: "Ke tla utwela botlhoko yo ke tla mo utwelang botlhoko; ke tla tlhomogela pelo yo ke tla mo tlhomogelang pelo." Jaanong he, ga se ga yo o ratang, gongwe ga yo o tabogang, mme ke ga Modimo fela o o utlwelang botlhoko. Ke ka moo o itshwarelang yo o ratang go mo itshwarela; e bile o thatafatsa pelo ya yo o ratang go e thatafatsa mo go ene."

Le fano re ka botsa gore **"Jaanong re tla reng? A go na le tshiamololo mo Modimong?" Karabo e re: "Le go ka!"**

Barategi go na le ba ba itshwenyegelang go utlwa Lefoko la Modimo, le go dumela mo go Jesu yo e leng Mopholosi wa bone, ba re: Ga go tsamaye ka fa maitshwenyegelong a bone, mme ka go utlwelwa botlhoko ke Modimo fela, ba re: Modimo o rata go utlwela botlhoko ba o ba utlwelang botlhoko, ba re: Le fa ba sa tlabologe, le e seng go dumela, ga ba na molato, ke wa Modimo. Ba re: Ke ona o o dirileng dipelo tsa bone go thatafala. A go ntse jalo? Bomorwa-Rre, nyaya, ga go a nna jalo. Ga go na tshiamololo mo Modimong. O thatafatsa dipelo tsa bone ka go ba betsa ka fa tshiamong ya ona, gone ba ne ba nyatsa Modimo, ba gana go amogela taletso ya ona e o ba bileditseng mo tlabologong le mo tumelong ka yona, ba sa hutsafalele maleo a bone, ba sa ikanye boitshwarelo jo ba bo baakanyeditsweng ke Jesu Keresete ka loso lwa gagwe mo sefapaanong. Ke gore go boeaelwa boammaaruri jo bo reng: Ba ba latlhwang ba latlha ka ntlha ya molato wa bone. A ba se ka ba baya molato mo Modimong, gone Modimo o rata gore batho botlhe ba pholosiwe ka bopelotlhomogi jwa ona ka go dumela mo go Jesu Keresete.

Ba ba bayang molato wa bone mo Modimong ka ntlha ya go sa dumele ga bone ba tshwanetse go lelelwa, jaaka Jesu a ne a lelela Jerusalema ka ntlha go sa tlabologe ga bone, a re: "Jerusalema, Jerusalema, yo o bolayang baporofeti, o kgobotletsa ba ba romilweng go wena! Ke ratile gantsi jang go phutha bana ba gago, fela jaaka kgogo e tle e phuthe dikgogwana tsa yona ka fa tlase ga diphuka; mme lo ganne!" Go ntse jalo, ba a latlha ka ntlha ya molato wa bone, gone ba ne ba gana.

3. Ke gona re boeaelang re botse potso la bofela e e reng: **"Jaanong re tla reng? A go na le tshiamololo mo Modimong?" Karabo e re: "Le go ka!"** A re tiiseng karabo eo ka mafoko a bofelo mo therong ya kajeno a a reng: "Jaanong o ka mpotsa o re: O sa ntse o kgalemelelang? Kana ke mang yo o ka emalalanang le go rata ga ona? Motho ke wena! Kana o mang yo o ka

ganetsanyang le Modimo? A sebopiwa se ka raya mmopi wa sona sa re: O mpopetseng jaana? A kampo mmopi ga a na thata mo letsopeng go dira selwana sengwe sa tlotlego le se sengwe sa tlotlologo, e ntse e le ka letsopa le le lengwe fela? Mme wena o ka reng, fa Modimo o ratile go supa bogale jwa ona le go itsise thata ya ona, o itshoketse ka bopelotelele jo bogolo dilwana tsa bogale tse di diretsweng tshenyego, gore o tle o supe lehumo la kgalalelo ya ona ka dilwana tsa bopelotlhomogi tse o di baakanyeditseng kgalalelo e sa le gale? Le rona o re biditse jalo, e seng mo Bajuteng fela mme le mo baheitaneng.”

Phuthego. Ke nnete, ga go na tshiamololo mo Modimong. Le go ka! Modimo Motlhodi wa rona o re tlhodile ka madi a le mangwe fela rotlhe, le fa re ka nna ba morafe ofe, le fa re ka nna ba mmala ofe. Se sengwe ke se: Modimo o re baakanyeditse rotlhe tsela e le nngwe fela go pholosiwa, e bong ka Morwaa-ona Jesu Keresete ka loso lwa gagwe mo sefapaanong. Ka moo barategi mo Moreneng, a re se ka ra neela Modimo molato, re tshwana le letsopa fela. Ga re letlelelwe go botsa Mmopi wa rona re re: O re diretseng jalo? Mo felong fa re tlhokomela sentle pharologanyo e e leng teng fa gare ga selwana sa bogale, le selwana sa kgalalelo. Sa bogale se diretswe tatlhego, mme ga go tshwaiwe gore ke mang yo o se diretseng tatlhego. Ka dilwana tsa kgalalelo re a bolelelwa gore di baakanyeditswe kgalalelo ke Modimo. Go tiisiwa jalo tse di boletsweng pele mo therong eno gore dilwana tsa bogale di baakanyeditswe tatlhego ka ntlha ya melato ya tsona, ka ntlha ya go sa amogele boitshwarelo jwa maleo a tsona, ka ntlha ya go nyatsa bopelotlhomogi jwa Modimo. Bogolo go lonyatso loo ba ne ba ganetsanya mo go maswe le thato ya Modimo ka manganga a a maswe a bone, ka go tlola ditaolo tsa ona mo go maswe.

Barategi, Modimo o re sikara rotlhe ka boitshoko jo bogolo. Ke nnete, le bone ba ba sa rateng go utlwa Lefoko la ona, ba ba sa dumeleng o a ba itshokela, o ntse wa rata, o ntse wa leta gore ba tlihabologe, ba dumele, ba pholosiwe le bone. Ee, le bone ba ba utlwang Lefoko la ona, o ba sikara ka bopelotlhomogi jwa ona, gonne o re rata rotlhe. Modimo Rraetsho yo o mo legodimong a o re thuse rotlhe, le rona ba re setseng re utlwile Lefoko la ona gore Mowa o o Boitshupo gore re neele ruri re botse potso e e reng: Tota-tota re tla reng? A go na le tshiamololo mo Modimong? Re nne re arabe, re re: Legoka, mo Modimong go na le tshiamo fela, tshiamo ya go betsa ba ba o nyatsang ka tshiamo e e leng ya molao wa ona, le tshiamo e o ratang ka yona gore batho botlhe ba merafe yotlhe ba pholosiwe, ba itshwarelwe maleo ka ntlha ya tshologo ya madi a ga Morwaa-ona yo o tsetsweng a le esi Jesu Keresete, e e leng tshiamo ya Efangele ya ona. Amen.

9. Thapelo: Morena, Modimo wa bopelotlhomogi, re a leboga, re lebogela Lefoko le le boitshepo la gago le re tswang go le utlwa. Morena, o re fe Mowa o o Boitshepo wa gago gore o re goge gore re ipolele, fa go se na tshiamololo epe mo go wena, le gore o re kgethetse go pholosiwa ka bopelotlhomogi ka go dumela mo go Jesu Keresete, rona ba re dumelang mo go wena, le fa re le ba morafe ofe. Morena, o re thuse gore re itshwarelele mo boammaaruring jo, go ya re gorosiwe mo botshelong jo bo sa khutleng ka ene Jesu Keresete, Morwao yo o tsetswang a le esi, ene yo o neng a swa, a ba a tsoga, a ntse e le Morena, le Mopholosi wa rona. Amen. Thapelo ya Morena: Rara wa rona yo o mo legodimong ...

10. Sefela sa 265 - 247/257

A kagiso ya Modimo e e fetang tthaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke F. J. Mtshali ka ngwaga wa 2013.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.